

ԱԶԴԱՐԱՐ

ՏԵՂԵԿԱՏՈՒ ԱՌԱՋՆՈՐԴԱՐԱՆԻ ՀԱՅՈՑ ԲՈՒԷՅՅԻ ԵՒ ՇՐՋԱԿԱՅԻՑ ՀԱՅՈՑ ԹԵՄԻՆ

P.O.Box: 8157, Salmiyeh 22052- Kuwait. Tel: 965-25614392, Fax: 965-25638312, e-mail: prelacy@armenianprelacykw.org

ՆՈՐ ՇՐՋԱՆ, Ը. Տարի, Թիւ 347, Ուրբաթ, 19 ՕԳՈՍՏՈՍ, 2016

ՀԱՄԱՅՆՔԱՅԻՆ

Ն.Ս.Օ.Տ.Տ. ԱՐԱՄ Ա. ԿԱԹՈՂԻԿՈՍ ԿԸ ՊԱՐԳԵՒԱՏՐԷ ՏԻԱՐ ԱՆՈՒՇԱԻԱՆ ՆԱԶԱՐԵԱՆԸ



Շաբաթ, 13 Օգոստոս 2016-ին, Ս. Աստուածածնայ Վերափոխման տօնին առիթով մատուցուած Ս. Եւ Անմահ Պատարագի աւարտին, Ն.Ս.Օ.Տ.Տ. Արամ Ա. Վեհափառ Հայրապետը Մեծի Տանն Կիլիկիոյ Կաթողիկոսութեան «Իշխան»ի շքանշանով պատուեց Քուէթի հայ գաղութի վերակազմաւորման ու եկեղեցաշինութեան աշխատանքներուն մէջ իր կարեւոր ներդրումը ունեցած Տիար Անուշաւան Նազարեանը:

Նորին Սրբութիւնը իր պատգամի ընթացքին գնահատեց Քուէթէն ժամանած պատուիրակութիւնը, իրենց նուիրուածութեան ու եկեղեցաշինութեան սուրբ գործին համար, ըսելով. «Երանի՛ եկեղեցի շինողներուն, որովհետեւ եկեղեցին Աստուծոյ տունն է. եկեղեցոյ

ճամբով մենք Աստուծոյ հետ հաղորդութեան մէջ կը մտնենք եւ եկեղեցոյ ճամբով Աստուած կենդանի ներկայութիւն կը դառնայ մեր կեանքէն ներս: Յեղասպանութենէն ետք մեր ժողովուրդին առաջին գործը եղաւ եկեղեցի շինել, որպէսզի Աստուած ներկայ դառնայ մեր մէջ: Մեր Սուրբ Աթոռը նոյն գիտակցութեամբ կը շարունակէ այս առաքելութիւնը Սփիւռքի գաղութներէն ներս, հաւատարիմ մնալով մեր նախնիներու աւանդին»:

Ապա, Նորին Սրբութիւնը շեշտեց եկեղեցոյ ունեցած դերը մեր հաւաքական ու համայնքային կեանքէն ներս, որպէս հոգեւոր եւ ազգային արժէքներու պահպանման կեդրոն: Խօսելով Քուէթի մեր համայնքին մէջ անցնող տարուան ընթացքին տեղի ունեցած եկեղեցաշինութեան Վեհափառ Հայրապետը յայտնեց, թէ Տիար Անուշաւան Նազարեանը եկեղեցաշինութեան յանձնախումբի ատենապետ ըլլալու կողքին, նաեւ մղիչ ուժը եղաւ Քուէթի մէջ հայկական նոր եկեղեցոյ եւ առաջնորդարանի մը շինութեան ծրագրին, բերելով իր բարոյական եւ նիւթական իշխանական մասնակցութիւնը:

Մեծի Տանն Կիլիկիոյ Կաթողիկոսութիւնը մի՛շտ բարձրօրէն կը գնահատէ եկեղեցի շինող, դպրոց կառուցող, մշակոյթ զարգացնող, համայնքային եւ բարեսիրական կեդրոններու նպաստողները: Այս մղումով, Վեհափառ Հայրապետը հազարաւոր

ուխտաւորներու ներկայութեան «Իշխան»ի շքանշանով պարգևատրեց Տիար Անուշաւան Նազարեանը:



ՍՈՒՐԲ ԱՍՏՈՒԱԾԱԾՆԻ ՎԵՐԱՓՈԽՄԱՆ ՏՕՆԸ ՔՈՒԷՅԹԻ ՄԷՋ

Հակառակ ամառնային արձակուրդներու շրջան ըլլալուն, Քուէյթի Սրբոց Վարդանանց Եկեղեցին տօնական մեծ օր մը ապրեցաւ, Աստուածածնայ Վերափոխման օրը, Ուրբաթ 12 Օգոստոսին:

Պատարագը մատուցեց եւ օրուայ պատգամը փոխանցեց թեմիս առաջնորդ՝ Գերպ. Տ. Մասիս Ծ. Վրդ. Զօպույեան, որ հաւատացեալներուն Աստուածամօր վերջին շրջանի կեանքին ու մահուան ինչպէս նաեւ վերափոխման հաստատման պատմականը ընելէ ետք, անդրադարձաւ Աստուածամօր տիպարին եւ եկեղեցոյ կեանքին մէջ անոր ունեցած իւրայատուկ ներկայութեան մասին: Ան շեշտեց Աստուածածնի փրկագործական խորհուրդին մէջ ունեցած իւրայատուկ դերակատարութիւնը, անդրադարձաւ անոր աղօթական կեանքին, մայրական կոչումին, հաւատարմութեան ու իր Միածին Որդիին մօտ մշտական բարեխօսութեան՝ դառնալով խորհրդանիշ քրիստոնէական վեհ առաքինութիւններու եւ առաջնորդ երանական երկնաւոր լուսոյ խորաններու արժանանալու ճամբուն:

Պատարագի արարողութեան ներկայ գտնուեցաւ Քուէյթի մօտ ՀՀ Հիւպատոս Տիար Լեւոն Պետրոսեան: Եկեղեցոյ Տիկնանց Յանձնախումբը, խաղողի ողկոյզներով զարդարած էր խորանը, իսկ հաւատացեալ ժողովուրդին նուիրած խաղողները ողողած էին ամբողջ բեմը:

Պատարագի ասարտին տեղի ունեցաւ խաղողօրինէքի յատուկ արարողութիւն:



ՀԱՅԿԱԿԱՆ

Նախարար Օհանեան Բարձր Գնահատած Է Պիեղոռուսիոյ Պաշտպանութեան Նախարարութեան Հետ Համագործակցութեան Մակարդակը

Հայաստանի եւ Պիեղոռուսիոյ պաշտպանութեան նախարարները 17 Օգոստոսին Երեւանի մէջ քննարկած են զինուորական համագործակցութեան առնչուած հարցեր: Հայաստանի պաշտպանութեան նախարարութեան վարչական համալիրին մէջ Պիեղոռուսիոյ պաշտպանութեան նախարար Անտրէյ Ռաբոլի գլխաւորած պատուիրակութեան հետ հանդիպումն ետք լրագրողներու հետ հանդիպման ընթացքին այս մասին յայտնած է պաշտպանութեան նախարար Սէրան Օհանեան:

«Այսօր մենք պաշտպանութեան նախարարութեան մէջ ընդլայնուած կազմով դեմ առ դեմ զրոյց ունեցած ենք: Մենք միտքեր փոխանակած ենք շրջանային եւ միջազգային իրավիճակին վերաբերեալ: Յատկապէս ուշադրութիւն դարձուցած ենք մեր շրջանին մէջ տիրող ռազմաքաղաքական իրավիճակին: Մեր շրջանին մէջ, կարելի է ըսել՝ իրավիճակը շատ բարդ է, եւ նման այցելութիւններ յատուկ նշանակութիւն ունին միացեալ ծրագրուած միջոցառումներու շարքը իրականացնելու համար», ըսած է նախարար Օհանեան:

Նախարարները յատուկ կերպով լուսարձակի տակ առած են նաեւ 2016-ին համար նախատեսուած ծրագիրներու իրականացումը:

Հանդիպումին ընթացքին քննարկուած են հայ-պիեղոռուսական զինուորական համագործակցութեան, երկկողմանի եւ բազմակողմանի ձեւաչափով տեղի ունեցող գործնական եւ մարտական պատրաստութեան միջոցառումներուն հայ եւ պիեղոռուս զինուորականներուն միացեալ մասնակցութեան վերաբերող խնդիրներ, միտքեր փոխանակուած են շրջանային եւ միջազգային անվտանգութեան առնչուող հարցերու շուրջ: Քննարկուած են նաեւ երկու պետութիւններու պաշտպանութեան նախարարութիւններուն միջեւ 2016-ի համագործակցութեան ծրագրի կատարման ընթացքն ու յառաջիկայ աշխատանքային ուղղութիւնները:

Արմէն Մարտիրոսեան Ազատ Արձակուած Է

Վերաքննիչ քրեական դատարանը 17 Օգոստոսին որոշում տուած է փոխել Ժառանգութիւն կուսակցութեան փոխնախագահ Արմէն Մարտիրոսեանի խափանման միջոց կալանքը՝ 1 միլիոն դրամ երաշխագինով:

«Երկիր»-ին հետ ունեցած զրոյցին ընթացքին Մարտիրոսեանի փաստաբանը՝ Գիւրի Յովհաննիսեան տեղեկացուցած է, որ ան ազատ պիտի արձակուի, հազիւ գումարը տրուի՝ դիտել տալով, թէ այդ առումով աշխատանք կը տարուի: Չորեքշաբթի օր աւելի ուշ Մարտիրոսեան ազատ արձակուեցաւ:



Արցախի Նախագահը Յանձնարարած Է Մշակել Եւ Ներկայացնել Սահմանադրութեան Նախագիծը

Արցախի Հանրապետութեան նախագահ Բակո Սահակեան 15 Օգոստոսին հանդիպում ունեցաւ Լեռնային Ղարաբաղի նախագահին առընթեր սահմանադրական բարեփոխումներու յանձնախումբի անդամներուն հետ: Քննարկուեցան սահմանադրական բարեփոխումներու հայեցակարգին վերաբերող շարք մը հարցեր:

Իր խօսքին մէջ Բակո Սահակեան շեշտեց, որ սահմանադրական բարեփոխումները կը վերաբերին մարդու իրաւունքներու եւ ազատութիւններու ընդլայնման ու ամրապնդման, դատական իշխանութեան եւ տեղական ինքնակառավարման համակարգերու կատարելագործման, անմիջական ժողովրդավարութեան հաստատութեան հետեւողական զարգացման:

Նախագահ Սահակեան նշեց, որ կազմաւորումէն ի վեր յանձնախումբը կատարած է ծաւալուն աշխատանք ու բազմակողմանի ուսումնասիրութիւններ, կազմակերպած է հանրային քննարկումներ, հաշուի առնուած է սահմանադրական բարեփոխումներու իրականացման վերաբերող թե՛ Հայաստանի Հանրապետութեան, եւ թե՛ տարբեր զարգացած երկիրներու փորձառութիւնը, եւ իբրեւ արդիւնք ներկայացուած է առաջարկ, որուն հիմքը նախագահական կառավարման համակարգն է:

«Հաշուի առնելով յանձնախումբին տեսակէտը, քաղաքական ուժերու մեծամասնութեան դիրքորոշումը, մեր տեղեկացուած ըլլալը բնակչութեան մեծամասնութեան կարծիքին, որ արտայայտուած է նաեւ վերջերս տեղի ունեցած ընկերային հարցախոյզներուն շնորհիւ՝ ես կ'ընդունիմ առաջարկուող տարբերակը եւ համաձայնութիւնս կու տամ սահմանադրական բարեփոխումներու հայեցակարգին եւ կը յանձնարարեմ յանձնախումբին՝ մշակել ու սահմանուած ժամկետով ներկայացնել սահմանադրական բարեփոխումներու նախագիծը», ընդգծեց երկրին ղեկավարը:

Հանդիպումին մասնակցեցան Ազգային ժողովի նախագահ Աշոտ Ղուկեան, վարչապետ Արա Յարութիւնեան եւ պաշտօնատար այլ անձեր:

ՀՅԴ-ն Դէմ Է Արցախի Սահմանադրական Փոփոխութիւններու Հայեցակարգը Կ'առաջարկէ Գերնախագահական Կառավարման Ձեւ

Լեռնային Ղարաբաղի Հանրապետութեան Ազգային ժողովին մէջ ներկայացուած 5 խմբակցութիւններէն 2-ը կողմ են սահմանադրական փոփոխութիւններու հայեցակարգով առաջարկուած՝ նախագահական ձեւին անցում կատարելու դրութեան, 2-ը՝ դէմ, իսկ 1-ը՝ վերապահութիւններ ունի ներկայացուածին վերաբերեալ:

Կիսանախագահական ձեւէն նախագահական ձեւին անցում կատարելու տարբերակին կողմ են Լեռնային Ղարաբաղի Հանրապետութեան Ազգային ժողովին մէջ մեծամասնութիւն կազմող «Ժողովրդավարութիւն» ու «Հայրենիք» խմբակցութիւնները: Դէմ են՝ «Դաշնակցութիւն» ու «Վերածնունդ» խմբակցութիւնները, իսկ «Շարժում-88»-ը թէեւ կողմ է կառավարման

կիսանախագահական համակարգին, բայց ներկայացուած տարբերակին ալ կտրականապէս դէմ չէ՝ որոշ վերապահութիւններով:

«Թերթ»-ին հետ զրոյցի մը ընթացքին ՀՅԴ խմբակցութեան ղեկավար, ՀՅԴ Արցախի Կեդրոնական կոմիտէի ներկայացուցիչ Դաւիթ Իշխանեան ըսաւ, որ առաջարկուած տարբերակը նախագահական կեդրոնացուած համակարգ է եւ դէմ է Դաշնակցութեան սկզբունքներուն, պահանջներուն: Ուստի ՀՅԴ-ն, Իշխանեանի փոխանցումով, դէմ է առաջարկուող հայեցակարգին:

«ՀՅԴ-ն իր տեսակէտը վաղուց ներկայացուցած է: Մենք կողմ ենք խորհրդարանական ձեւին եւ ներկայացուցած ենք նման հայեցակարգ», ըսաւ Դաւիթ Իշխանեան:



Պատասխանելով այն հարցումին, թէ ՀՅԴ Արցախի Կեդրոնական կոմիտէն ինչպէ՞ս իր անհամաձայնութիւնը պիտի դրսեւորէ, Իշխանեան ըսաւ, որ հարցը քննարկման ընթացքի մէջ է: Պատգամաւորը շեշտեց, որ Հայաստանի մէջ Դաշնակցութիւնը սկզբունքօրէն կողմ եղած է, պաշտպանած է խորհրդարանական կառավարման ձեւը, եւ ՀՅԴ Արցախի Կեդրոնական կոմիտէն չի կրնար այլ տեսակէտ ունենալ:

Ղազախաստանի Նախագահը Պիտի Այցելէ Հայաստան Եւ Ազրպէյճան

«ՌԻԱ Նովոսթի» կը հաղորդէ, որ Ղազախաստանի արտաքին գործոց նախարար Երլան Իտրիսով յայտնած է, թէ Ղազախաստանի նախագահ Նուրսուլթան Նազարպայեւ 2016-ին պիտի այցելէ Հայաստան, Ազրպէյճան, Սերպիա եւ շարք մը այլ երկիրներ:



Յունիսին Իտրիսով յայտնած էր, որ Ղազախաստանի նախագահը 2016-ին պիտի այցելէ Ճափոն, Հարաւային Քորէա, Մեքսիկոյի Արաբիա եւ Յորդանան, իսկ Սեպտեմբերին՝ Խրբիսըզիստան:

«Նախագահին միջազգային օրակարգը շատ ծանրաբեռնուած է: Մենք պիտի մեկնինք Լեհաստան, աշնան՝ Սերպիա, մենք նաեւ հրաւիրուած ենք Սեպտեմբերի սկիզբը Չինաստանի մէջ Ութերու խմբակի վեհաժողովին, մեր նախագահը նաեւ պիտի այցելէ Ճափոն, Հարաւային Քորէա, Ազրպէյճան, Հայաստան, Մեքսիկոյի Արաբիա եւ Յորդանան», ըսած է ան:

www.astagdaily.com

Հայաստանին Պիտի Մատակարարուի Նոյն Չէնքը Ինչպէս՝ Ագրպէյճանին

«Ազատութիւն» ձայնասփիւռի կայանը կը հաղորդէ, որ ռուսական «Իզվեսթիա» թերթը 16 Օգոստոսին հրապարակած է «Ռուսիան Հայաստանին պիտի մատակարարէ նոյն զէնքը, ինչպէս՝ Ագրպէյճանին» վերնագիրով յօդուած մը, որուն մէջ նշուած է, թէ երկու հարիւր միլիոն տոլար արժող վարկին դիմաց Հայաստանին զէնքի մատակարարումը արդէն սկսած է: Այս մասին կը գրէ Ազա Բաբայեան:

Մակայն պաշտօնական Մոսկուան եւ Երեւանը ժամկէտներու ու մատակարարուող զէնքի տեսակին մասին մանրամասնութիւն չյայտնեցին:

Հեղինակը կը գրէ, որ զէնքի մատակարարումէն բացի ռուսական կողմը պիտի զբաղի նաեւ այդ զէնքին սպասարկող հայ մասնագէտներու վերապատրաստութեամբ: Ընդ որում, «Իզվեսթիա»-ն գրուցած է Հայաստանի պաշտպանութեան նախարարութեան բանբեր Արծրուն Յովհաննիսեանի հետ, որ հաստատած է այս տեղեկութիւնը:

Մասնագէտներուն կարծիքով, խօսքը կը վերաբերի ծանր սպառազինութեան, որուն առկայութիւնը մեծապէս կը զօրացնէ հայկական բանակը: Ասոր զուգահեռ, «Իզվեսթիա» կը շեշտէ, որ, թէեւ մատակարարումը սկսած է, այսուամենայնիւ զէնքի տեսակներու վերջնական ցանկը տակաւին համաձայնեցուած չէ: Թէեւ պաշտօնական Երեւանը մերժած է մանրամասնութիւն տալ այն մասին, որ յատկապէս ի՞նչ զինատեսակներու մասին է խօսքը, սակայն ռուսական թերթը կը գրէ, որ Հայաստան մտադիր էր Ռուսիայէն գնել նախ եւ առաջ «Սմերչ» եւ «Մոլնցեպեօ» համակարգերը, «ԻԳԼԱ-ԷՍ» հրթիռային համակարգը, «Աւտոբազա ԷՄ» համակարգը, «Տիգր» զրահամեքենաներ:

«Իզվեսթիա»-ն կը մէջբերէ նաեւ 10 Օգոստոսին Հայաստանի եւ Ռուսիոյ նախագահներուն տուած մամլոյ միացեալ ասուլիսին ընթացքին նախագահ Փութինին այն յայտարարութիւնը, որ Հայաստան Ռուսիոյ դաշնակիցն է Հաւաքական անվտանգութեան պայմանագրի կազմակերպութեան մէջ, եւ որ Ռուսիա ունի պարտաւորութիւններ, զորս միշտ կը կատարէ:

Զինուորական հարցերով փորձագէտ Անտրէյ Ֆրոլով թերթին ըսած է, որ Մոսկուան Հայաստանին պիտի տրամադրէ միեւնոյն զէնքը, որ աւելի կանուխ գնած էր Ագրպէյճան: Այդ զէնքը, ի հարկէ, պիտի զօրացնէ հայկական կողմը, բայց եւ այնպէս, ըստ փորձագէտին, Պաքու որոշ առաւելութիւն ունի: «Հայաստանի եւ Ագրպէյճանի պիտաճեալ տարբերութիւնը շատ մեծ է: Այս պայմաններուն մէջ կարելի է միայն յստակ հասցեագրուած ներդրումներով իրավիճակը չհասցնել զգայուն կէտի», յայտնած է ան:

Ան յիշեցուցած է, որ 2011-2012-ին կնքուած համաձայնագիրներով Ռուսիան Ագրպէյճանին վաճառած է շուրջ չորս միլիար տոլարի զէնք:

«Ազատութիւն» ձայնասփիւռի կայանը 16 Օգոստոսին փորձած է զէնքի մասին տեղեկութիւն ստանալ Երեւանի մէջ գումարուող Հաւաքական անվտանգութեան պայմանագրի կազմակերպութեան պաշտպանութեան նախարարներու հաւաքին մասնակցող Ռուսիոյ պաշտպանութեան նախարար Սերկէյ Շոյկուէն, սակայն ան մերժած է կապ ունենալ հայ լրագրողներուն հետ:

ՄԻՋԱԶԳԱՅԻՆ

**Իրանեան Ռազմակայաններուն Օգտագործումը
Ապահովութեան Խորհուրդի Որոշումի Խախտում
Նկատելով՝ Ուաշինկթըն Կը Սպառնայ Սուրիոյ Մէջ
Պատերազմը Երկարաձգել Մինչեւ Սուրիական
Վարչակազմի Տապալումը**

Միացեալ Նահանգներու արտաքին գործոց նախարարութեան բանբեր Մարք Թոնըրը յայտարարեց, որ եթէ Ռուսիոյ կողմէ Իրանի ռազմակայաններուն օգտագործման լուրերը ճիշդ են, ապա «ատիկա կրնայ խախտում մը ըլլալ ՄԱԿ-ի Ապահովութեան Խորհուրդի թիւ 22311 բանաձեւին, որ կ'արգիլէ առանց Ապահովութեան Խորհուրդի հաւանութեան՝ Իրանին մարտական օդանաւերու վաճառքը կամ մատակարարումը»:

Ան ըսաւ, որ Ռուսիոյ այդ քայլը թէւեւ ոչ անակնկալ, սակայն ցաւալի հարց է՝ աւելցնելով, որ Միացեալ Նահանգներու արտաքին գործոց նախարար Ճոն Քերրին իր ռուս պաշտօնակից Սերկէյ Լաւրովի հետ հեռաձայնային հաղորդակցութեան մը ընթացքին մտահոգութիւն յայտնած է ռուսական ռաբաժիզներու իրանեան ռազմակայանէ մը թռիչք առնելուն առնչութեամբ:

Թոնըրը յայտնեց, որ Մոսկուայի հետ Սուրիոյ հարցին վերաբերեալ համաձայնութիւն չէ գոյացած:

Միացեալ Նահանգներու նախագահի՝ Ազգային ապահովութեան Խորհուրդին մէջ յատուկ օգնական Ռոպըրթ Մալի իր կարգին յայտնեց, որ Ուաշինկթըն կը ձգտի Սուրիոյ հարցով Մոսկուայի հետ գործակցելու՝ աւելցնելով, որ եթէ երկու երկիրներուն միջեւ գործակցութիւնը ձախողի, ապա իր երկիրը պիտի շարունակէ զենք մատակարարել սուրիական ընդդիմութեան, թէւ քաջ կը գիտակցի, թէ այդ քայլը պիտի երկարաձգէ զինեալ տագնապը:

«Ուաշինկթըն պատրաստ է ամէն բան ընելու, որպէսզի սուրիական վարչակազմը չյաջողի», ըսաւ ան:

Ռուսիոյ արտաքին գործոց նախարար Սերկէյ Լաւրով յայտնեց, որ «Համատանի օդակայանը օգտագործելուն համար Ռուսիան միջազգային որոշումի խախտումի յանցանքով ամբաստանելը անհիմն է»՝ նշելով. «Ռուսական պատերազմական օդանաւերը Իրանէն թռիչք կ'առնեն ահաբեկչութեան դէմ պայքարի ծիրին մէջ»:

«Մենք կը քննարկենք ՄԱԿ-ի կողմէ Սուրիա-Թուրքիա սահմանի հսկողութեան որոշում մը», ըսաւ Լաւրով՝ նշելով. «Միացեալ Նահանգներ ընդունեցին, որ անկարող են Սուրիոյ մէջ չափաւորական ընդդիմութիւնն ու ահաբեկիչները իրարմէ անջատել»:

Մինչ այդ, «Ռոյթըրզ» լրատու գործակալութիւնը հաղորդեց, որ ՄԱԿ-ի ընդհանուր քարտուղար Պան Քի Մուն Ապահովութեան Խորհուրդին յղած իր վերջին հաշուետուութեան մէջ գրած է. «Հալէպի մէջ մենք կը դիմագրաւենք Սուրիոյ տագնապին պատճառով հինգ տարուան արինահեղութեան ու տառապանքներու ընթացքին աննախադէպ մարդասիրական աղէտի վտանգը»:

Ան Ռուսիան եւ Միացեալ Նահանգները յորդորած է շուտափոյթ համաձայնութեան հասնիլ Հալէպի եւ Սուրիոյ այլ շրջաններուն մէջ բախումներու դադրեցման շուրջ:

«Տարածքներու եւ հարստութեան համար մարտերը կ'ընթանան բնակելի թաղամասերու դէմ անկանոն յարձակումներու միջոցով: Անոնց գոհ կը դառնան հարիւրաւոր խաղաղ քաղաքացիներ, ներառեալ՝ տասնեակ երեխաներ», յայտարարած է Քի Մուն՝ աւելցնելով. «Տագնապին կողմերէն ոչ մէկը կը կատարէ խաղաղ բնակչութեան պաշտպանութեան իր պարտաւորութիւնները»:

Միւս կողմէ, Ռուսիոյ պաշտպանութեան նախարարութիւնը հաղորդեց, որ «Սուրիոյ» տիպի ուժաձիգներ Չորեքշաբթի օր Իրանէն թոյլատրուած ուժերով ուժակոծած ու քանդած են Սուրիոյ մէջ գտնուող ՏԱՀԵՇ-ի հրամանատարական կեդրոններ:

Թուրքիա Կը Հրաժարի Իսրայէլի Դէմ Դատական Հայցերէն

«Անատոլու» լրատու գործակալութիւնը կը հաղորդէ, որ Թուրքիոյ արդարադատութեան նախարար Պեքիր Պոզտաղ Չորեքշաբթի օր լրագրողներուն յայտարարած է, որ Իսրայէլ «Մաւի Մարմարա» նաւուն հետ կապուած միջադէպին համար Թուրքիոյ պիտի վճարէ 20 միլիոն տոլարի փոխհատուցում: Ըստ անոր, նշեալ գումարը պէտք է վճարուի յառաջիկայ 25 օրերուն ընթացքին:

«Մքայ Նիուզ» իր կարգին հաղորդեց, որ թրքական կառավարութիւնը որոշած է հրաժարիլ Իսրայէլի դէմ իր յարուցած դատական հայցերէն:

Նախապէս Թուրքիոյ վարչապետ Պինարի Երլտըրըմ յայտնած էր, որ Իսրայէլ ընդունած է յարաբերութիւնները բնականոնացնելու համար Թուրքիոյ բոլոր պայմանները:

Պոզտաղ Կը Զգուշացնէ Ուաշինկթընը Կիւլենի Հարցով Անգարայի Հետ Ճակատելէ



Թուրքիոյ արդարադատութեան նախարար Պեքիր Պոզտաղ զգուշացուց Միացեալ Նահանգները ամերիկաբնակ իսլամ քարոզիչ Ֆեթհուլլա Կիւլենի հարցով Թուրքիոյ հետ ճակատելէ:

Ան յայտնեց, որ ամերիկեան վարչակազմը կը զբաղի «Թուրքիոյ մէջ յեղաշրջումի ձախող փորձին յանցանքով ամբաստանուած Կիւլենի արտայանձնման հարցով»՝ նշելով. «4 պաշտօնատարներէ բաղկացած ամերիկեան

պատուիրակութիւն մը 22 Օգոստոսին պիտի այցելէ Թուրքիա, իսկ թրքական պատուիրակութեան Միացեալ Նահանգներ այցելութեան թուականը տակաւին չ'է ճշդուած»:

Պոզտաղ զգուշացուց Միացեալ Նահանգները «ներկայ հանգրուանին Թուրքիոյ եւ թուրք ժողովուրդին հետ ճակատումի մէջ մտնելէ»՝ նշելով. «Թուրք-ամերիկեան յարաբերութիւնները 15 յուլիսի յեղաշրջման փորձէն առաջուան նման պիտի չըլլան, եթէ Միացեալ Նահանգներ զինք չյանձնեն, որովհետեւ պիտի կորսնցնեն թուրք ժողովուրդը»:

ԱՆՂՐԱՂԱՐՁ

Ֆրանսայի Խորհրդարանի Կայքին Կարելուր Ձեռակերպումը

Ֆրանսայի խորհրդարանի լրատուական կայքին Արցախի նախագահին տուած հարցազրույցը տեղի տուած է տարատեսակ մեկնաբանութիւններու: Խնդրայարոյց հարցազրույցի վերածուած այս երեւոյթը հայկական ելեկտրոնային եւ յատկապէս այլընտրանքային լրատուութեան դաշտին մէջ աղմուկ բարձրացուցած է եւ այս ուղղութեամբ գրառումներու եւ հաստատումներու հեղեղի մը առիթ տուած:



Նախ, երկու խնդրայարոյց բաժինները մէջբերենք.

Խորագիրը՝ «Ազրպէյճանը իր մէջ պետք է գտնէ կամք՝ մերժելու ցեղային կարծրատիպերը արցախցիներուն եւ հայերուն նկատմամբ»:

Պարզ է, որ այստեղ ըսել ուզուածը այն է, որ Ազրպէյճան ո՛չ միայն արցախահայութեան նկատմամբ ցեղային կարծրատիպերով կ'առաջնորդուի իբրեւ պետական քաղաքականութիւն, այլ նաեւ՝ Հայաստանի Հանրապետութեան: Եւ եթէ այս պարագային հայերէնէ ֆրանսերէնի թարգմանութիւնը ճիշդ չէ եղած, ապա երկրորդին պարագային հակառակ ուղղութեամբ ճիշդ չէ աշխատած թարգմանիչը:

Այսպէս. երկրորդը՝ «ողջմիտ եւ համարժէք քոմփրոմիներ պետք են: Մենք պատրաստ ենք քոմփրոմիի (թարգմանիչը թարգմանած է զիջում), եթէ անոնք խնդրոյ առարկայ չեն դարձներ մեր անվտանգութիւնը եւ առիթ չեն ստեղծեր հակառակորդին նոր յարձակումներ սանձազերծելու համար»:

Օգտագործուած բառը քոմփրոմին է ֆրանսերէնով, որ կը նշանակէ համաձայնութիւն, փոխզիջում կամ դիւանագիտական գործարք: Յստակ չէ, թէ ինչո՞ւ հայերէն թարգմանութիւնը, որ շրջանառութեան մէջ դրուած է եւ աղմուկ բարձրացուցած քոմփրոմի բառին, եղած է զիջում. որմէ նաեւ՝ միակողմանի զիջումի ընկալումը:

Հայաստանեան վերջին իրադարձութիւններէն ետք տիրող ներհայկական անվտանգութեան մթնոլորտին մէջ իւրաքանչիւր եղելոյթ կը մեկնաբանուի ըստ ցանկութեան, ի սպառ կը բացակայի առարկայականութիւնը եւ ծայր կ'առնէ փոխադարձ ամբաստանութիւններու կրքոտ փոխասացութիւններու շարք մը: Արցախի նախագահին այս հաստատումները եւս անմասն չեն մնացած այս ընդհանուր մթնոլորտէն:

Արցախի նախագահին մամլոյ բանբերը ոչ միայն հերքած է Բակո Սահակեանին վերագրուող այս երկու թիրիմացութիւնները, այլ նաեւ յայտարարած, որ պաշտօնական լրատուական կայքին մօտ պիտի աշխատին սրբագրել տալ սխալ թարգմանութեան իբրեւ արդիւնք արձանագրուածը:

Նախագահի մակարդակով այլ երկրի մը լրատուական կայքին հաղորդածը հերքել եւ սրբագրութիւն առաջադրելու նախաձեռնութիւն չ'ըլլար, եթէ բնագրային ճշգրտութիւնը ապահովուած չ'ըլլայ: Հետեւաբար առնուազն ճիշդ պիտի չ'ըլլար Բակո Սահակեանի մօտ Արցախի եւ Հայաստանի Հանրապետութեան ժողովուրդները իրարմէ անջատ

հասկացողություններ համարելու գոյություն չունեցող մօտեցումը ընդգծելը: Կամ ալ փոխզիջումը կամ համաձայնությունը, որ օրինաչափ եզրոյթ է, վերածելը զիջումի, միակողմանի պարտուողականութեան դարձեալ գոյութիւն չունեցող վարքագիծ փոխանցելու համար:

Հարցազրոյցը ընդհանրապէս պատշաճ եզրութաբանութեամբ եւ համարժէք մտածողութեամբ բովանդակութիւն ունի: Թարգմանական վրիպումները գաղափարաբովանդակային սխալի վերածելն ու այդ մասին աղմուկ բարձրացնելը մեղմ ըսելաձեւով օգտակարութիւն չեն ունենար:

Կայ նաեւ այլ խնդիր, որ քաղաքական մօտեցումի կը վերաբերի. ընթերցողը պէտք է կարենայ նկատել թէ՛ ոճային եւ թէ՛ եզրաբանական որոշ տարբերութիւններ ներքին լսարանի եւ արտաքին լսարանի ուղղուած յայտարարութիւններուն մէջ. եւ սահկա ոչ միայն հայկական առումով անշուշտ:

Այն շեշտադրումը, որ օրինակ Ֆրանսայի խորհրդարանի լրատուական կայքի խմբագիրը ուզած է տեսնել եւ խորագրի վերածել Բակօ Սահակեանի արծարծած նիւթերէն ցեղային կարծրատիպի պետական վարքագիծն է, որ Պաքուն կը կիրարկէ հայութեան նկատմամբ: Այս նիւթը համաեւրոպական ընկալելիութիւն ունի, եւ նախագահը նման ուղերձ փոխանցելով յաջողած է եւրոպական արժէքներու լեզուով խօսիլ Ֆրանսայի օրէնսդիր իշխանութեան պաշտօնական լրատուամիջոցի պատասխանատուներուն հետ: Ուղերձը հանգիստ վերածուած է խորագրի: Նաեւ ա՛յս մէկը պէտք է նկատել հայկական որեւէ լրատուամիջոց, եթէ առարկայականութեամբ եւ պետական մտածողութեամբ առաջնորդուելու խնդիր դրած ըլլար իր առջեւ:

Փոխզիջումի, համաձայնութեան (այն ալ՝ պայմանական) մասին խօսիլը միջազգային հանրութեան լսարանին առջեւ մնայուն առաջ մղուած սկզբունք է թէ՛ պաշտօնական Երեւանի եւ թէ՛ Ստեփանակերտի կողմէ: Այստեղ ոչինչ կայ խնդրայարոյց. ի վերջոյ բանակցութիւնները կ'ընթանան փոխզիջումային ձեւաչափի վրայ լուծման յանգելու համար: Այստեղ նախագահը պայմանական առաջադրանքներ դրած է հասնելիք համաձայնութեան համար. առաջին՝ եթէ խնդրոյ առարկայ չեն դարձներ Արցախի անվտանգութիւնը եւ առիթ չեն տար հակառակորդին նոր յարձակումներ սանձազերծելու:

Ցաւօք, հայկական լրատուամիջոցներէն վրիպած է այս երկու կէտերէն շատ աւելի կարեւոր երեւոյթ մը: Ֆրանսայի խորհրդարանի լրատուական կայքի համապատասխան էջին խորագրային ձեւակերպումներուն մէջ Բակօ Սահակեանը ներկայացուած է իբրեւ Լեռնային Ղարաբաղի Հանրապետութեան նախագահ: Ասիկա նշողը ֆրանսական լրատուամիջոց կամ վերլուծական կայք չէ. սահկա նշողը Ֆրանսայի խորհրդարանի պաշտօնական խօսափողն է: Ինչ որ ենթադրել կու տայ, որ նման ձեւակերպումը Արցախի Հանրապետութեան ճանաչումին նպաստող երեւոյթ է:

Այո՛, ցաւօք. անվստահելիութիւնը, սխալ պրպտելու համար խոշորացոյցերով համացանցային մշտադիտարկումներ ընելու եւ աղմուկ բարձրացնելու փորձութիւնը այնքան թեժացած են այս օրերուն, որ կը վրիպի Ֆրանսայի օրէնսդիր իշխանութեան պաշտօնական կայքին կողմէ Արցախի Հանրապետութեան (առանց չճանչցուած բնութագրումը աւելցնելու) պաշտօնական ձեւակերպումը: Բան մը, որ փոխան հայկական կողմին, ազրպէյճանական կողմը խորապէս անհանգստացուցած պիտի ըլլար:

«Ա.»

ԱԿՆԱՐԿ

Երիտասարդության Միջազգային Օրուան Առթիւ...

12 Օգոստոսը Երիտասարդության միջազգային օրն է: Այս տարի ՄԱԿ-ը այս օրը օգտագործած էր երիտասարդության մասնակցությունն ու ներգրաւուածությունը ամրագրելու ՄԱԿ-ի Կայուն զարգացման նպատակներու իրականացման մէջ: Ամբողջ աշխարհի մէջ բազմաթիւ ու զանազան նախաձեռնություններ կազմակերպուեցան, համացանցի եւ ընկերային հաղորդակցութեան ցանցերու կարելիությունները օգտագործուեցան, հանդիպումներ, արշաւներ, հաւաքներ ու զանազան ծրագիրներ գործադրուեցան:



Ընկերություններուն մէջ երիտասարդութեան ունեցած դերին ու տեղին մասին քննարկումները ժամանակավրէպ դարձած են: Աշխարհը կը խօսի ո՛չ թէ երիտասարդութեան կարելորդութեան մասին, այլ՝ երիտասարդին ունեցած կարողություններն ու հնարաւորությունները լաւագոյնս օգտագործելու ձեւերուն եւ միջոցներուն: Աւելի՛ն. շուկայի տրամաբանութեամբ, երիտասարդութիւնը այնքան սկսած է մրցունակ դառնալ, որ գործի ասպարէզներու մէջ տարիքային խտրականութեան եւ մարդկային իրաւանց խախտումներու հարցեր սկսած են բարձրանալ:

Երիտասարդութեան հետ կապուած ներկայի ու ապագայի միջեւ մասնատումներ կատարելը այդքան ալ գործնական չէ: Երիտասարդութիւնը իր այսօրուան ունեցած կարելիություններուն պատճառով շրջած է զանազան հասկացողություններ: Իսկ մենք տակաւին երիտասարդութեան կարելորդութիւնը գովերգելով զբաղած ենք: Կը հաստատենք, որ երիտասարդութիւնը մեր ներկան ու ապագան է, բայց այս հաստատումները կը մնան բեմերու վրայ, եւ մենք մեր հաւաքական կեանքին մէջ քիչ կը հանդիպինք խորքով ու ոգիով, որակեալ ու նպատակաւայաց երիտասարդականացած եւ ժամանակակից ծրագիրներու: Ինչպէս՝ շարք մը երեւոյթներու մէջ, կեղեւով կը հետաքրքրուինք ու կորիզը կ'անտեսենք:

Մեր կառոյցներուն մէջ երիտասարդ ներգրաւելը ՄՈՏԱՅԻՔ երեւոյթի վերածելէ աւելի՝ խորքային համոզում պէտք է դառնայ, եւ երիտասարդութեան տեղ ու առիթ տալը ո՛չ թէ լոկ ցուցադրութեան համար կատարուի, այլ նաեւ երիտասարդական մտքի ու ոգիի վերակենդանութեան ծառայէ: Քիչ չէ թիւը այն կառոյցներուն, որոնք երիտասարդ տարրեր, գեղեցիկ գրասենակներ ու այլ հնարաւորություններ ունենալէ ետք կը

շարունակեն հին ու մաշած, ժամանակավրէպ աշխատելառճերով գործել: Երիտասարդականնալ՝ չի նշանակեր միայն արդիական գործիքներ, համացանցային հնարաւորութիւններ ու տարիքով երիտասարդ աշխատակիցներ ունենալ, այլ կ'ենթադրէ՝ կարծրատիպերը յաղթահարել, մտածելակերպերը վերատեսութեան ենթարկել, յստակ ռազմավարութիւններ ճշդել, առարկայական մօտեցում ցուցաբերել, տեղայնական ու նեղ հորիզոններէ խուսափիլ եւ լայն ու համամարդկային-համաշխարհային մտասէւեռումներ ունենալ:

Շարք մը կառոյցներու մէջ, ըլլան անոնք կամաւոր թէ վճարովի, երիտասարդ տարր ունենալու պատրուակին տակ պաշտօններ կը տրամադրուին անբան, երբեմն անուս կամ ոչ մասնագէտ, չարամիտ ու խորամանկ երիտասարդներու, որոնք կը ժառանգեն ու կը կրեն հինէն արմատաւորուած ձրիակերութեան, աթոռապաշտութեան, պնակլեզութեան, կոյր կամակատարութեան ու շահամոլութեան զգուելի ախտերը: Միւս կողմէ՝ ընդունելու ենք նաեւ, որ սփիւռքեան կառոյցներուն կամաւոր եւ կամ վճարովի աշխատանքները օրէ օր կը կորսնցնեն իրենց հմայքը եւ չեն բաւարարեր այսօրուան ժամանակակից ու պահանջուած տուեալներով օժտուած երիտասարդին բազմապիսի (ներառեալ նիւթական) պահանջները: Այս երեւոյթներուն պատճառները բազմաթիւ են, սակայն կարելի է յաղթահարել զանոնք, երբ մասնագիտական մօտեցում կը ցուցաբերուի, նշեալ կառոյցներուն մէջ հաստատութենականութեան հիմքերը կ'ամրապնդուին, եւ բոլորին արդար, հաւասար ու արժանավայել հնարաւորութիւններ կը տրամադրուին:

Այս ծիրին մէջ սփիւռքահայ երիտասարդութիւնը եւ սփիւռքեան երիտասարդական միութիւններն ու հաստատութիւնները, բաղդատած հայաստանաբնակ երիտասարդութեան ու կառոյցներուն, նուազ ներգրաւուած են միջազգային ծրագիրներու եւ աշխատանքներու մէջ: Միայն ՄԱԿ-ի մէջ տասնեակ ծրագիրներ կան, որոնք մեր երիտասարդութեան առջեւ նոր հորիզոններ կը բանան, յարաբերութիւններ մշակելու, նորարարութիւններու ծանօթանալու եւ համաշխարհային բեմերու վրայ մեր ազգային խնդիրները արծարծելու առիթներ կը ստեղծեն: Կ'արժէ լուրջ աշխատանք տանիլ՝ սփիւռքահայ երիտասարդութիւնը համակարգուած ձեւով միջազգային երիտասարդական անցուդարձերուն մէջ ներգրաւելու: Լաւ է ուշ, քան երբեք:

Իրենք զիրենք երիտասարդ նկատող եւ 21-րդ դարու երիտասարդին պատասխանատուութիւններուն տէր բոլոր երիտասարդներուն օրը շնորհաւոր:

ԳԷՆՐԳ ՅԱԿՈԲՃԵԱՆ
Վիեննա, 12 Օգոստոս 2016

www.armenianprelacykw.org

ԼՈՒՐԵՐ ԳՍՂՈՒԹՆԵՐԷՆ

Լիզպոնի Հինգ Տղոց Յիշատակին Նուիրուած Ձեռնարկ



30 յուլիսին «Արամ Մանուկեան» ժողովրդային տան «Քրիսեան» սրահին մէջ տեղի ունեցաւ Լիզպոնի հինգ տղոց յիշատակին նուիրուած ձեռնարկ՝ կազմակերպութեամբ ՀՄԸՄ-ի Հալէպի մասնաճիւղի գայլիկ-արծուիկներու միաւորներուն:

Յայտագիրը կը բովանդակէր Լիզպոնի գործունէութեան մասին դասախօսութիւն, հերոսները անմահացնող երգի ուսուցում, ձեռային աշխատանք եւ մարզանք:

Առտու տեղի ունեցաւ քայլարշաւ դէպի Ս. Աստուածածին եկեղեցի, ուր գայլիկ-արծուիկները մոմավառութիւն կատարեցին ի յիշատակ Լիզպոնի հինգ հերոսներու հոգիներուն, ապա անոնք իրենց պատրաստած պատի թերթը զետեղեցին եկեղեցոյ բակին մէջ:

Իսկ Հալէպի մասնաճիւղի արի-արենուշ եւ երէց-պարման միաւորները 31 յուլիսին «Ճորճ Մալեմ» վանքին մէջ կիսօրեայ գործունէութեամբ նշեցին Լիզպոնի տղոց յիշատակը: Լիզպոնի գործունէութեան նուիրուած յայտագիրի մը ընդմէջէն անոնք ստացան դասախօսութիւն, կատարեցին երգի ուսուցում եւ հարց-պատասխանի մրցում: Այնուհետեւ անոնք ուղղուեցան Ս. Աստուածածին եկեղեցի, ուր մոմավառութեամբ յարգեցին Լիզպոնի տղոց յիշատակը:

Լիզպոնի Անձնագոհներուն Յիշատակի Ոգեկոչում



Նախաձեռնութեամբ ՀՅԴ Յունաստանի երիտասարդական միութեան Կեդրոնական վարչութեան, 24 յուլիսին Քոքինիոյ Ս. Յակոբ եկեղեցոյ մէջ, յաւարտ Ս. պատարագի, տեղի ունեցաւ հոգեհանգստեան արարողութիւն՝ Լիզպոնի գործողութեան 33-րդ տարելիցին առիթով:

Օրուան պատարագիչ, Ս. Յակոբ եկեղեցոյ հովիւ Վահրիճ վրդ. Ղարախանեան իր քարոզին մէջ անդրադարձաւ Լիզպոնի տղոց անձնագոհութեան գաղափարական օրինակին եւ անկէ ոգեղէն դասեր

քաղելու կարելորութեան:

Հոգեհանգստեան արարողութեան աւարտին եկեղեցոյ սրահին մէջ կազմակերպուեցաւ հաւաք: ՀՅԴ Յունաստանի երիտասարդական միութեան Կեդրոնական վարչութեան ուղերձը արտասանեց Ալէքսան Հելվաճեան, որ կարելորութեամբ շեշտեց հաւատարիմ մնալ Լիզպոնի տղոց պատգամին՝ կոչ ուղղելով մնալու քաջ, գիտակից, պահանջատէր եւ սկզբունքային, առանց զիջելու ճնշումներու կամ պայմաններու դիմաց:

Գրիգոր Զօհրապի Ծննդեան 155- Ամեակին Նուիրում Գրական Երեկոյ



Նախաձեռնութեամբ Նոր Զուղայի Հայ ՄՍ «Արարատ» միութեան մշակութային միաւորի գրական խումբին եւ համագործակցութեամբ Ս. Ամենափրկիչ վանքի «Ս. Ներսէս Շնորհալի» գրադարանին, վերջերս նոյն միութեան յարկին տակ տեղի ունեցաւ գրական երեկոյ՝ նուիրում Գրիգոր Զօհրապի ծննդեան 155-ամեակին:

Կազմակերպիչ միութեան անունով Ռիմա Սիմոնեան-Օհանեան ամփոփ կէտերու մէջ

տեղեկութիւններ տուաւ գրական խումբին, «Ս. Ներսէս Շնորհալի» գրադարանին եւ երեկոյի կազմակերպման մասին:

Օրուան բանախօս Անանիա Ծ. վրդ. Գուճանեան ներկայացուց Գ. Զօհրապի կենսագրութիւնը եւ իր ուսումնասիրութիւնը, որ կը վերաբերէր ազգային-հասարակական եւ քաղաքական դաշտին մէջ Զօհրապի ունեցած մեծ ներդրումին եւ յատկապէս՝ որպէս փաստաբանի, դիւանագետի, լրագրողի եւ Թուրքիոյ խորհրդարանի պատգամաւորի ազգային շահերէն մղուած կարեւոր ներդրումին մասին:

Աւարտին Անանիա Ծ. վրդ. Գուճանեան կոչ ուղղեց գրականութեամբ հետաքրքրուելու եւ կարդալու մեր մեծերուն ու նախնիներուն պատմութիւնն ու գրականութիւնը եւ անոնց կտակը փոխանցելու նոր սերունդին:

Շաբաթօրեայ Դպրոցներու Ընդհանուր Պատասխանատու Կը Նշանակուի Բագրատ Ծ. Վրդ. Պերճեքեան

Քանի մը տարի առաջ թեմի առաջնորդ Յովնան արք. Տերտերեանի կողմէ կազմուեցաւ Շաբաթօրեայ դպրոցներու յանձնախումբը՝ ատենապետութեամբ դոկտ. Էլլի Անդրեասեանի, որ կանոնաւոր կերպով կ'այցելէ տարբեր ծուխերու շաբաթօրեայ դպրոցներ, հանդիպում կ'ունենայ աշակերտներու հետ եւ համապատասխան ուղղութիւն կու տայ ուսուցչուհիներուն, մեծ նուիրումով հայ պատանիներուն կը փոխանցեն մայրենի լեզուն եւ մեր հազարամեայ մշակոյթի ազգային գիտակցութիւնը՝ օգտագործելով դասաւանդութեան արդիական մօտեցումները եւ հայ մանկավարժութեան ասանդակական մեթոտները:

Ծրագիրի աղբիւրներն են հայոց լեզուի ու գրականութեան տեղական եւ հայրենական դասագիրքեր, հայոց պատմութեան, հայ մշակոյթի, հայրենագիտութեան եւ արդիական հարցերու շուրջ գոյութիւն ունեցող նիւթեր, դասախօսութիւններ, յօդուածներ, զանազան լսատեսողական եւ կայքէջային նիւթեր:

Շաբաթօրեայ դպրոցներու առաքելութեան առաւել յաջողութեան համար առաջնորդ սրբազան հայրը Կեդրոնական խորհուրդի ընդհանուր պատասխանատու նշանակեց առաջնորդական ընդհանուր փոխանորդ Բագրատ Ծ. վրդ. Պերճեքեանը, որ մօտէն պիտի հետեւի բոլոր ծրագիրներուն եւ անհրաժեշտ ուղղութիւնները պիտի տայ:

«Ո՞վ Սպաննեց Հայերը» Ժապաւենի Անդրանիկ Ցուցադրութիւնը



Վերջերս Աղեքսանդրիոյ մէջ տեղի ունեցաւ «Ո՞վ սպաննեց հայերը» ժապաւենի անդրանիկ ցուցադրութիւնը, ներկայութեամբ հեղինակներուն՝ լրագրող Մարիամ Զաքիի եւ բեմադրիչ Մուհամետ Հանաֆիի:


Ժապաւենը, որ կը ներկայացնէ Հայոց ցեղասպանութիւնը, արժանացած է բազմաթիւ մրցանակներու՝ Նիւ Եորքի ժապաւենի փառատօնին,

ինչպէս նաեւ, Լիբանանի փառատօնին: Ժապաւենի բեմադրիչներ Մ. Հանաֆի եւ լրագրող Մ. Զաքի վերջերս պարզեւտրուած են Հայաստանի նախագահին կողմէ:

Մ. Զաքի խօսելով ժապաւենին մասին՝ ըսաւ, որ մարդկութեան հանդէպ պարտաւորութիւն զգալով՝ մասնակցած է բեմադրիչ Հանաֆի աշխատանքին, աւելցնելով, որ ժապաւենին մէջ ներկայացուած խնդիրը այսօր կը կրկնուի արաբական երկիրներուն մէջ:

Ժապաւենի բեմադրիչը նշեց, որ ժապաւենը մեծ յաջողութիւն ունեցաւ միջազգային մակարդակով, աւելցնելով, որ աւելի այլանդակ բաներ տեղի ունեցած են, սակայն չէին կրնար զանոնք ներառել ժապաւենին մէջ, որովհետեւ անհաւատալի պիտի թուէին՝ հակառակ անոր որ անոնք պատահած են:

Արցախի Անկախութեան 25-ամեակին Նուիրուած Ցուցահանդէս



Նախաձեռնութեամբ Ֆրեզնոյի Հայկական թանգարանին, 2 Սեպտեմբերէն 16 դեկտեմբերի միջեւ տեղի պիտի ունենայ Արցախի Հանրապետութեան անկախութեան 25-ամեակին նուիրուած ցուցահանդէս մը՝ «Արցախի ոգին» խորագիրով:

Ցուցահանդէսին պաշտօնական բացումը տեղի պիտի ունենայ 2 Սեպտեմբերին, որուն ընդմէջէն լուսարձակի տակ պիտի առնուի դարերու ընթացքին Արցախի ժողովուրդին մղած ազատագրական պայքարը, որ կը շարունակուի մինչեւ այսօր:

Մօտաւորապէս 20 ցուցատախտակներու վրայ, քարտէսներու եւ լուսանկարներու օգտագործումով, պիտի ներկայացուի Արցախի մօտ 2500 տարուան պատմութիւնը:

Յատուկ տեղ պիտի տրամադրուի Մեսրոպ Մաշտոցի հաստատած Ամարաս վանքի վարժարանին, Արցախի գորգագործութեան եւ գինեգործութեան, ինչպէս նաեւ՝ Արցախի ինքնորոշման իրաւունքին համար տարուած պայքարին:

Ցուցահանդէսը պատրաստող գլխաւոր արուեստագէտներն են Ռուբիկ Քոչարեան եւ Արեւ Պետրոսեան: